

INFORMACIJA
o kretanju makroekonomskih pokazatelja
za januar/siječanj - mart/ožujak 2025. godine

Sadržaj

Uvod.....	3
1. Realni sektor.....	7
<i>Kretanje industrijske proizvodnje.....</i>	7
<i>Maloprodaja.....</i>	9
<i>Transport.....</i>	9
<i>Tržište rada.....</i>	10
2. Javne finansije.....	13
<i>Indirektni porezi u Bosni i Hercegovini.....</i>	13
<i>Prihodi od direktnih poreza, doprinosa i neporeskih prihoda</i>	15
3. Cijene, monetarni i finansijski sektor.....	16
<i>Cijene.....</i>	16
<i>Monetarni sektor.....</i>	18
<i>Bankarski sektor.....</i>	18
<i>Berze u Bosni i Hercegovini.....</i>	20
4. Vanjski sektor.....	20
<i>Vanjskotrgovinska robna razmjena.....</i>	22
5. Strana direktna ulaganja.....	23

Uvod

Vijeće ministara Bosne i Hercegovine je na 79. sjednici održanoj 05.03.2009. godine razmotrilo i usvojilo Prijedlog mjera iz nadležnosti Vijeća ministara Bosne i Hercegovine za ublažavanje uticaja globalne ekonomske krize na privredu Bosne i Hercegovine. Direkcija za ekonomsko planiranje je zadužena da u vezi sa navedenim prati kretanje makroekonomskih pokazatelja i da izvještaj o kretanju mjesečno dostavlja Vijeću ministara.

Direkcija je zadužena da „Informaciju“ dostavlja mjesečno Parlamentarnoj skupštini Bosne i Hercegovine u svrhu praćenja uticaja svjetske ekonomske krize na ekonomiju Bosne i Hercegovine.

„Informacija“ obuhvata kretanje glavnih makroekonomskih pokazatelja u Bosni i Hercegovini za navedeni period. Detaljna pojašnjenja svih oblasti koje su obuhvaćene u ovom dokumentu se mogu naći u Ekonomskim trendovima Bosne i Hercegovine koje publikuje Direkcija, kvartalno - četiri puta godišnje, te redovno dostavlja Vijeću ministara i Parlamentu Bosne i Hercegovine.

* * *


U ovom dokumentu biće prikazani podaci za nivo Bosne i Hercegovine i entitetske nivoe, gdje je to moguće. Prikazani podaci za nivo BiH ne predstavljaju prosti zbir/prosjek podataka entiteta za svaki od sektora.

U vrijeme pripreme ove informacije raspoloživost statističkih podataka o ekonomskim kretanjima u Bosni i Hercegovini u 2025. godini bila je veoma ograničena. U skladu s tim, ova informacija o kretanju makroekonomskih pokazatelja u martu 2025. godine je pripremljena na bazi raspoloživih statističkih podataka, a gdje to nije bilo moguće korišteni su podaci iz prethodnog perioda.

U 2024. godini u Bosni i Hercegovini je nastavljen je trend ekonomskog rasta iz prethodne godine. Naime, prema podacima BHAS-a za 2024. godinu (BDP, rashodni pristup, tromjesečni podaci) procjenjuje se da je **realni rast BDP-a u Bosni i Hercegovini iznosio 2,5%**.¹ Posmatrano po kvartalima, realni rast BDP-a u K1 2024. godine iznosio je 2,5%, u K2 2,3%, u K3 2,6% i u K4 2,6% u odnosu na isti period prethodne godine. Na prikazanom grafikonu je vidljivo da ekonomski trendovi u Bosni i Hercegovini imaju visok stepen korelacije za privrednim kretanjima u zemljama EU, s tim da je u 2024. godini ostvarena stopa realnog rasta BDP-a bila nešto viša. Uporedni prikaz trenda kretanja BDP-a u Bosni i Hercegovini i EU27 po kvartalima prikazan je na grafikonu ispod.

¹ Agencija za statistiku Bosne i Hercegovine, Saopštenje, „Bruto domaći proizvod, rashodni pristup, tromjesečni podaci za K4 2024. godinu“, 31.03.2025. godine.


Grafikon 1: Realni rast BDP-a u Bosni i Hercegovini po kvartalima (stopa rasta g/g)



Izvor: BHAS i EUROSTAT

Ako se pažljivije posmatra struktura ostvarenog rasta BDP-a u Bosni i Hercegovini u 2024. godini (2,5%) može se zaključiti da je domaća tražnja (potrošnja i investicije) bila glavni nosilac ekonomskog rasta, dok izvozna tražnja imala negativan utjecaj na rast BDP-a. Pored privatne potrošnje, pozitivan doprinos rastu ostvaren je i u okviru investicija obzirom da su iste u 2024. godini (statistički posmatrano) ostvarile dvocifren porast u odnosu na isti period prethodne godine. Međutim, prilikom interpretacije ovog rasta investicija i doprinosa ekonomskom rastu potrebno je imati u vidu da ova kategorija uključuje i zalihe što znatno otežava analizu doprinosa investicija u strukturi ekonomskog rasta u Bosni i Hercegovini. S druge strane, u 2024. godini doprinos vanjskog sektora u ekonomskom rastu u Bosni i Hercegovini za razliku od prethodnih godina bio je negativan što je vidljivo na grafikonu br.2. Naime, prema trenutno raspoloživim međunarodnim statističkim podacima u zemljama EU došlo je usporavanja ekonomskog rasta (registrirani rast BDP-a u 2024. godini iznosio oko 0,8%) što se negativno odrazilo na izvoz roba i u konačnici na ekonomski rast u Bosni i Hercegovini. Pregled strukture ekonomskog rasta u Bosni i Hercegovini u 2024. godini po komponentama rasta prikazan je na grafikonu ispod.

Grafikon 2: Struktura ekonomskog rasta u Bosni i Hercegovini u 2024. godini po komponentama



Izvor: BHAS

Kada su u pitanju ekonomska kretanja u 2025. godini treba istaći da je raspoloživost podataka za potrebe analize bila dosta ograničena. Na bazi raspoloživih domaćih i međunarodnih

pokazatelja može se konstatovati da trend rasta ekonomske aktivnosti kako u Bosni i Hercegovini tako i u vanjskom okruženju nastavljen. Naime, prema preliminarnim podacima Eurostat-a registrirana stopa rasta na nivou EU27 u K1 2025. godine iznosila je 1,4% što je nešto niže u odnosu na isti period prethodne godine.² Ako se ima u vidu da ekonomska kretanja u zemljama EU predstavljaju veoma važnu strukturnu odrednicu ekonomskih trendova u Bosni i Hercegovini može se zaključiti da je nastavak istih prilično očekivan. U nedostatku podataka iz nacionalnih računa a na bazi trenutno raspoloživih različitih kratkoročnih statistika procjenjuje se da je u Bosni i Hercegovini u K1 2025. godine rast ekonomske aktivnosti nastavljen. Trenutno raspoloživi statistički podaci na tržištu rada ukazuju da je u K1 2025. godine došlo do povećanja broja zaposlenih lica od oko 1% i realnog rasta plata od skoro 10%, koji bi uz porast priliva doznaka iz inostranstva i rasta kredita u sektoru stanovništva od 9,8% mogli ukazivati na povećanje privatne potrošnje u Bosni i Hercegovini. S druge strane, vrijedi istaći da je inflacija u Bosni i Hercegovini u K1 2025. godini mjerena indeksom potrošačkih cijena iznosila oko 3,4% što je nešto više u odnosu na prethodnu godinu. Međutim, podaci o povećanju ukupnih javnih prihoda za 7,3% i povećanju prikupljenih neto prihoda od PDV-a za 5,6% na indirektan način potvrđuju pretpostavku o nastavku trenda rasta privatne potrošnje u Bosni i Hercegovini. Pored privatne potrošnje, vrlo vjerovatno je došlo i do povećanja javne potrošnje (podaci nisu bili dostupni) obzirom na najavljena povećanja minimalne plate kako u privatnom tako i u javnom sektoru na različitim nivoima u Bosni i Hercegovini. Ove procjene o nastavku ukupne potrošnje (privatne i javne) obzirom na zastupljenost potrošnje u strukturi BDP-a od oko 2/3 gotovo sigurno se će rezultirati povećanjem BDP-a u zemlji tokom posmatranog perioda. Zvanični podaci o kretanjima javnih i privatnih investicija u K1 2025. godine nisu bili raspoloživi za upotrebu prilikom pripreme ovog izvještaja. Međutim, povećanje kredita u sektoru nefinansijskih poduzeća od oko 8,7% i porast uvoza kapitalnih dobara za 1,6% mogu biti informativni kada je u pitanju kretanja investicija u u Bosni i Hercegovini u K1 2025. godine

S druge strane, određeni pokazatelji iz vanjskog okruženja kao i preliminarni podaci o vanjskotrgovinskoj robnoj razmjeni u Bosni i Hercegovini su nešto povoljniji u odnosu na prethodnu godinu. Poboljšanje ovih makroekonomskih indikatora u K1 2025. godine moglo bi ukazivati na nešto bolji doprinos vanjskog sektora u strukturi ekonomskog rasta u Bosni i Hercegovini u 2025. godini. Naime, prema podacima Eurostat-a preliminarna stopa rasta BDP-a u zemlji EU iznosila je 1,4%, što se odrazilo na izvoznju tražnju za bh. izvoznim proizvodima i rezultiralo nominalnim povećanjem izvoza roba iz Bosne i Hercegovine od 6,8% u odnosu na isti period prethodne godine. S druge strane, stopa rasta uvoza roba u Bosnu i Hercegovinu u K1 2025. godine iznosila je 5,5% što je posljedica trenda rasta domaće tražnje (potrošnja i investicije). Ovakva kretanja izvoza i uvoza djelimično su stabilizirali trend rasta vanjskotrgovinskog deficita, tako da je doprinos istog u strukturi rasta bio nešto povoljniji u odnosu na isti period prethodne godine.

² <https://ec.europa.eu/eurostat/web/products-euro-indicators/w/2-30042025>
ap#:~:text=In%20the%20first%20quarter%20of,office%20of%20the%20European%20Union.

Pregled makroekonomskih indikatora u 2024. i 2025. godini po mjesecima

		2024.	2025.		
Naziv indikatora	Mjerna jedinica		I	II	III
1. Realni sektor					
*BDP	stopa rasta g/g u %	2,5	N/A	N/A	N/A
** Populacija	u milionima	N/A	N/A	N/A	N/A
*BDP/per capita	u KM	N/A	N/A	N/A	N/A
Fizički obim indust. proizvodnje	stopa rasta g/g u %	-4,2	-0,8	-6,1	-0,6
Prerađivačka indust.	stopa rasta g/g u %	-4,4	0,6	-8,2	-3,7
Građevinarstvo	stopa rasta g/g u %	2,8	N/A	N/A	N/A
Maloprodaja	stopa rasta g/g u %	6,4	-1,3	-4,4	-2,9
Turizam	stopa rasta g/g u %	10,3	8,5	3,9	-5,8
2. Tržište rada					
Zaposlenost	u hiljadama	855,8	860,0	857,7	N/A
Rast zaposlenosti	stopa rasta g/g u %	0,7	1,2	0,8	N/A
Nezaposlenost	u hiljadama	328,6	323,6	324,3	324,2
Rast nezaposlenosti	stopa rasta g/g u %	-5,8	-5,0	-4,2	-3,3
Prosječna neto plata	u KM	1.381	1.508	1.506	N/A
Nominalni rast prosječne neto plate	stopa rasta g/g u %	9,4	13,5	12,6	N/A
3. Vanjski sektor					
Izvoz roba	stopa rasta g/g u %	-3,7	3,7	8,1	8,2
Uvoz roba	stopa rasta g/g u %	3,2	9,8	3,6	4,0
Trgovinski bilans	stopa rasta g/g u %	13,7	19,4	-2,2	-0,8
*Bilans tekućeg računa	udio % BDP	4,0	N/A	N/A	N/A
*Direktna strana ulaganja	udio % BDP	3,8	N/A	N/A	N/A
Devizne rezerve (kraj perioda)	u mlrd. KM	17,6	17,3	17,0	16,9
4. Monetarni agregati i cijene					
Inflacija, CPI	stopa rasta g/g u %	1,7	3,3	3,5	3,2
Hrana	stopa rasta g/g u %	1,6	5,2	5,7	6,3
Goriva i maziva	stopa rasta g/g u %	-3,8	-3,6	-4,2	-8,4
Proizvođačke cijene (kraj perioda)	stopa rasta g/g u %	2,7	3,3	4,1	3,1
M2 (kraj perioda)	stopa rasta g/g u %	9,3	8,9	8,4	7,5
5. Bankarski sektor					
Ukupni krediti (kraj perioda)	stopa rasta g/g u %	9,8	9,8	10,1	10,0
Ukupni depoziti (kraj perioda)	stopa rasta g/g u %	8,8	8,4	7,8	6,3
6. Javne finansije					
Ukupni javni prihodi (porezi, doprinosi, dr.)	stopa rasta g/g u %	9,4	2,6	8,6	9,0
Direktni porezi	stopa rasta g/g u %	13,7	1,1	11,9	-0,2
Socijalni doprinosi	stopa rasta g/g u %	10,2	8,2	14,6	15,9
Bruto prihodi od indirektnih poreza	stopa rasta g/g u %	8,5	1,2	3,7	8,8
Neto prihodi od indirektnih poreza	stopa rasta g/g u %	11,8	-0,3	-0,3	16,1
Neto prihodi od PDV	stopa rasta g/g u %	11,5	0,9	-0,3	18,3
*Javni dug sektora vlade	udio u % BDP	26,8	N/A	N/A	N/A

1. U tabeli su prikazani zvanični podaci Agencije za statistiku Bosne i Hercegovine i administrativni podaci određenih institucija u Bosni i Hercegovini.
2. Prikazane stope rasta po mjesecima predstavljaju kretanje pokazatelja u navedenom mjesecu u odnosu na isti mjesec prethodne godine.
3. * označava pokazatelje koji su dostupni samo nivou kvartalnih vremenskih serija (mart- K1), (juni- K2), (septembar- K3) i (decembar-K4).
4. ** Posljednji raspoloživi podatak je procjena za 2023. godinu (3,422 miliona). Izvor: BHAS, Demografija 2023.

1. Realni sektor

Kretanje industrijske proizvodnje

Trend kretanja fizičkog obima industrijske proizvodnje u Bosni i Hercegovini pored proizvodnih procesa u zemlji, u velikoj mjeri je određen ekonomskim kretanjima u glavnim trgovinskim partnerima odnosno izvoznom tražnjom. Obzirom da je u posljednje vrijeme ekonomska aktivnost u zemljama EU bila prilično stagnantna to se odrazilo i na trend kretanja fizičkog obima industrijske proizvodnje u zemlji. Naime, Bosna i Hercegovina već duži vremenski period bilježi trend usporavanja fizičkog obima industrijske proizvodnje. U skladu sa ovim vanjskim kretanjima Bosna i Hercegovina bilježi niži nivo fizičkog obima industrijske proizvodnje, ovo se naročito odnosi na prerađivačku industriju. Naime, trenutno raspoloživi statistički podaci za 2025. godinu ukazuju da je negativan trend u okviru industrijske proizvodnje u Bosni i Hercegovini nastavljen. Tako je prema podacima BHAS-a za K1 2025. godine u Bosni i Hercegovini registriran pad fizičkog obima industrijske proizvodnje od 2,6% u odnosu na isti period prethodne godine.³ S druge strane, ako se posmatra na mjesečnom nivou može se konstatovati da je proizvodnja u martu 2025. godine u odnosu na isti mjesec prethodne godine smanjena za 0,6%. Ako se kretanja fizičkog obima industrijske proizvodnje posmatraju na entitetskom nivou može se konstatovati da je trend kretanja ujednačen. Tabela prikazuje kretanja fizičkog obima industrijske proizvodnje u Bosni i Hercegovini po entitetima za period januar-mart 2025. godine prikazan je ispod.


Tabela 1: Kretanje fizičkog obima industrijske proizvodnje u periodu januar-mart 2025. godine, po entitetima (stopa rasta u %, g/g)

2025	Federacija Bosne i Hercegovina	Republika Srpska
mart	0,3%	-1,2%
januar-mart	-1,5%	-4,1%

Izvor: Federalni zavod za statistiku Federacije Bosne i Hercegovine i Republički zavod za statistiku Republike Srpske

S druge strane, sektorski posmatrano prema podacima BHAS-a za period januar-mart 2025. godine pad obima proizvodnje u rudarstvu iznosio 3,1%, prerađivačkoj industriji 4,0%, dok u okviru sektora za proizvodnju električne energije zabilježeno povećanje proizvodnje od 3,0%. Pregled strukture fizičkog obima industrijske proizvodnje po sektorima prikazan je na grafikonu ispod.


Grafikon 3: Kretanje fizičkog obima industrijske proizvodnje u Bosni i Hercegovini u K1 2025. godini po sektorima (rast g/g)



Izvor: BHAS

³ Agencija za statistiku Bosne i Hercegovine, Saopštenje, „Indeks obima industrijske proizvodnje u Bosni i Hercegovini za mart 2025. godine-prethodni podaci“, 26.04.2025. godine.

Na osnovu ovih pokazatelja može se zaključiti da je pad proizvodnje u okviru prerađivačke industrije koja čini 3/4 ukupne industrije i ima visok stepen izvozne orijentacije, predstavljao jedan od ključnih razloga za pad ukupnog obima industrijske proizvodnje u Bosni i Hercegovini u periodu januar-mart 2025. godine. Kao što je ranije navedeno trendovi kretanja u okviru prerađivačke industrije u Bosni i Hercegovini skoro u potpunosti su determinisani kretanjima iste u glavnim trgovinskim partnerima. S druge strane, posmatrano po granama najznačajnija smanjenja proizvodnje a samim tim i negativan doprinos u okviru ukupne prerađivačke industrije imale su izvezno orijentirane grane proizvodnje. Grafički prikaz kretanja proizvodnje u okviru prerađivačke industrije u Bosni i Hercegovini po granama u periodu januar-mart 2025 godine po granama prikazan je ispod.



Maloprodaja

Prema zvaničnim podacima BHAS-a⁴ u periodu januar-mart 2025. godine zabilježeno je realno smanjenje prometa u ukupnoj maloprodaji od 2,9% g/g (ukupan promet u navedenom periodu iznosio je 3,89 milijardi KM, promet je niži za 114 miliona KM). Ovo smanjenje prometa u maloprodaji bi sasvim sigurno bilo izraženije, ali to je donekle amortizovala trgovina motornim gorivima (dalje u tekstu s.p.) koja je ostvarila realan rast prometa za 6,8% g/g (promet u navedenom periodu iznosio je 710 miliona KM, veći je za 45 miliona KM u odnosu na isti period prethodne godine). Istovremeno je promet u trgovini na malo osim trgovine motornim gorivima u s.p. niži za 4,8% g/g (promet je iznosio 3,18 milijardi KM, niži za 160 miliona KM).

Tabela 2: Ukupna maloprodaja po entitetima (stopa rasta u %, g/g)

2025. godina	Republika Srpska	Federacija Bosne i Hercegovine
januar-mart ⁵	5,9	-1,1
mart	5,2	-0,8

Izvor: Republički zavod za statistiku Republike Srpske⁶, Federalni zavod za statistiku Federacije Bosne i Hercegovine⁷

⁴ Izvor podataka: BHAS, Indeksi prometa trgovine na malo u Bosni i Hercegovini, mart 2025.

⁵ prosjek mjesečnih stopa


⁶ Izvor podataka: Republički zavod za statistiku Republike Srpske Trgovina na malo, mart 2025. godine

⁷ Izvor podataka: Federalni zavod za statistiku Federacije Bosne i Hercegovine, Trgovina na malo prvi rezultati za mart/ožujak 2025. godine

Podaci prikazani u tabeli iznad se mogu razlikovati od podataka BHAS-a zbog korištenja različitih modela koji se koriste za desezoniranje podataka.

Prema zvaničnim podacima za mjesec mart 2025.godine, realno smanjenje prometa maloprodaje u Bosni i Hercegovini, iznosilo je 2,9% g/g. Trgovina motornim gorivima u s.p., u martu 2024. godine, je porasla za 0,9% (povećanje prometa za 2 miliona KM) dok je kod ostatka trgovine na malo (kada se izuzme trgovina motornim gorivima u s.p.) zabilježeno smanjenje prometa za 3,6 % g/g (promet je niži za 43 miliona KM).

Grafikon 5: Ukupna trgovina na malo u Bosni i Hercegovini u mjesecu martu po godinama (stopa rasta g/g)



Izvor: BHAS

Promet u trgovini na malo hranom, pićem i duhanskim proizvodima u nespecijaliziranim prodavnicama (dalje u tekstu n.p.) ostvario je rast od 3,4% g/g/ (veći je za 12 miliona u odnosu na isti mjesec prethodne godine) dok je u istovremeno promet u trgovinama na malo hranom, pićem i duhanskim proizvodima u s.p. niži za 6,3% g/g (odnosno za 2,4 miliona KM).

U strukturi trgovine na malo neprehrambenim proizvodima (u ovoj kategoriji ukupan promet u ovoj kategoriji je iznosio 753 miliona KM, smanjen je za 52 miliona KM) se primjećuje da su skoro sve kategorije zabilježile smanjenje prometa.


Tako je kod trgovine na malo ostalom robom u s.p. promet je niži za 8% g/g, odnosno za 44 miliona KM, trgovina na malo ostalom opremom za domaćinstvo je registrovala smanjenje prometa za 1,5% g/g (odnosno za 1,5 miliona KM). Kod trgovine na malo informacijsko komunikacijskom opremom promet je niži za 10,2% g/g (ukupan promet u mjesecu martu 2025. godine iznosio je 11,8 miliona KM, smanjenje prometa za 1,4 miliona KM) kao i kod trgovine na malo proizvodima za kulturu i rekreaciju gdje je zabilježeno smanjenje prometa za 6,4% g/g (odnosno za 1,2 miliona KM).

U sklopu trgovine ostalom robom u s.p., u mjesecu martu 2025. godine, trgovina na malo namještajem, opremom za rasvjetu i električnim aparatima za domaćinstvo predstavlja izuzetak jer je zabilježila povećanje prometa od 21% g/g (promet je uvećan za 6,1 miliona KM). Najveće smanjenje prometa je zabilježeno u kategoriji trgovine na malo tekstilom, odjećom, obućom i proizvodima od kože gdje je promet iznosio 368 miliona (smanjen je za 33 miliona KM g/g), zatim u apotekama, trgovini na malo medicinskim i kozmetičkim preparatima gdje je promet iznosio 108 miliona KM i niži je za 2,7 miliona KM g/g. Smanjenje prometa je također registrovano i u trgovini na malo sportskom opremom, igrama i igračkama u s.p. te u trgovini na malo knjigama, novinama, muzičkim i videozapisima u s.p.

Transport

Podaci za cestovni transport u Bosni i Hercegovini, za K4 2024. godine, ukazuju na pad transporta u sve tri kategorije koje su obuhvaćene ovih vidom prevoza. Tako je u cestovnom prevozu roba zabilježeno smanjenje od 11,7% g/g (prevezeno je 282 hiljade tona robe manje u odnosu na K4 2023. godine). Broj prevezenih putnika u cestovnom prevozu bilježi smanjenje od 2,8% dok je istovremeno prevoz putnika u gradsko-prigradskom prevozu niži za 12,6%. I u željezničkom saobraćaju također je zabilježeno smanjenje prometa roba i putnika, pa je tako opseg prevezeno robe manji za 41,3% g/g (prevezeno je 1,5 miliona tona robe manje u odnosu na K4 2023. godine) dok je sa druge strane broj prevezenih putnika u željezničkom saobraćaju niži za 35,1% g/g (39 000 putnika manje). Kod avio saobraćaja je, u K4 2024. godine, zabilježeno značajnije povećanje broja prevezenih putnika za 31,4% u odnosu na isti period prošle godine (broj prevezenih putnika veći je za 131 hiljadu).

Grafikon 6: Prevoz robe i putnika u Bosni i Hercegovini – u K4 po godinama (rast g/g u %)



Izvor: BHAS

Tabela 3: Ukupan transport po entitetima u K4 2024. godine (stopa rasta g/g u %)

K4 2024.godine	Republika Srpska	Federacija Bosne i Hercegovine
Cestovni (prevezeno robe)	-8,6	-10,6
Cestovni (prevezeni putnici)	-1,6	-4,0
Gradsko - prigradski prijevoz (prevezeni putnici)	13,7	-18,0
Željeznički (prevezeno robe)	-20,6	-41,3
Željeznički (prevezeni putnici)	-12,5	-17,1

Izvor: Republički zavod za statistiku Republike Srpske, Federalni zavod za statistiku Federacije Bosne i Hercegovine

Tržište rada

Podatak o broju zaposlenih lica u Bosni i Hercegovini za mart 2025. godine nije objavljen u periodu pripreme Informacije, pa se podaci u tekstu odnose na februar 2025. godine.

U februaru 2025. godine broj zaposlenih lica u Bosni i Hercegovini bio je veći za 0,8% u odnosu na isti mjesec prethodne godine i iznosio oko 857,7⁸ hiljada. Stopa rasta broja zaposlenih lica je nešto sporija na šta je uticalo smanjenje broja zaposlenih lica u oblasti industrijske

⁸ Privremeni podatak. Izvor: BHAS.

proizvodnje. U djelatnosti prerađivačke industrije broj zaposlenih lica je smanjen za 2,6% g/g uz negativan doprinos rastu od 0,5 p.p. Ova djelatnost zapošljava oko 19,5% ukupno zaposlenih lica u Bosni i Hercegovini. S druge strane, najznačajniji doprinos rastu broja zaposlenih bio je u oblastima trgovine na veliko i malo, popravka motornih vozila i motocikala sa stopom rasta od 2,8% g/g uz doprinos rastu ukupnog broja zaposlenih oko 0,5 p.p. Značajan rast broja zaposlenih bio je i u djelatnosti pružanja smještaja⁹, te pripreme i usluživanja hrane (4% g/g), djelatnosti zdravstvene i socijalne zaštite (3% g/g) i u području ostalih uslužnih djelatnosti (7,8% g/g). Ove djelatnosti imale su doprinos rastu ukupnog broja zaposlenih lica po 0,2 p.p. Broj zaposlenih lica po entitetima predstavljen je u tabeli ispod.

Tabela 4: Broj zaposlenih¹⁰ lica

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
I-XII 2024	855.764	0,7%	547.660	1,2%	289.722	-0,3%
I-2025	860.041	1,2%	547.291	1,0%	-	-
II-2025	857.707	0,8%	545.427	0,5%	-	-

Izvor: Agencija za statistiku Bosne i Hercegovine, Federalni zavod za statistiku Federacije Bosne i Hercegovine, Republički zavod za statistiku Republike Srpske

Broj registrovanih nezaposlenih lica u martu 2025. godine manji je za 3,3% u odnosu na isti mjesec 2024. godine i iznosio je oko 324,2 hiljada. Smanjenje broja nezaposlenih lica u poređenju sa prethodnom godinom je registrovano u oba entiteta što se može vidjeti u tabeli ispod.

Tabela 5: Broj registrovanih nezaposlenih lica

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
I-XII 2024	328.623	-5,8%	260.298	-6,1%	56.323	-7,8%
I-2025	323.628	-5,0%	257.914	-4,1%	53.956	-8,6%
II-2025	324.314	-4,2%	258.831	-3,1%	53.749	-8,7%
III-2025	324.233	-3,3%	259.278	-2,1%	53.279	-8,7%

Izvor: Agencija za statistiku Bosne i Hercegovine, Agencija za rad i zapošljavanje Bosne i Hercegovine, Zavod za zapošljavanje Republike Srpske, Federalni zavod za zapošljavanje Federacije Bosne i Hercegovine

Podatak o prosječnoj neto plati u Bosni i Hercegovini za mart 2025. godine nije objavljen u periodu pripreme Informacije, pa se podaci u tekstu odnose na februar 2025. godine.

U Bosni i Hercegovini prosječna neto plata u februaru 2025. godine nominalno je veća za 12,6% u odnosu na isti mjesec 2024. godine i iznosila je 1.506 KM (realni rast prosječne neto plate bio je 8,7%). Najveća prosječna isplaćena neto plata u februaru 2025. godine bila je u području informacija i komunikacija (2.069 KM), dok je najniža prosječna isplaćena neto plata u području djelatnosti pružanja smještaja, te pripreme i usluživanja hrane (1.122 KM). Na brži rast prosječnih neto plata uticalo je povećanje najnižih plata u oba entiteta (detaljnije u Informaciji za januar-februar 2025. godine).

Prosječne neto plate su uvećane u svim područjima djelatnosti. Ipak, najveće nominalne stope rasta prosječne neto plate u februaru 2025. godine bile u području djelatnosti pružanja smještaja, te pripreme i usluživanja hrane (26,6% g/g), građevinarstva (20% g/g), djelatnosti

⁹ U Bosni i Hercegovini u januaru 2025. turisti su ostvarili 99.491 posjeta, što je za 8,5% više u odnosu na januar 2024. godine. Turisti su ostvarili 234.350 noćenja, što je za 9,5% više u odnosu na januar 2024. godine. Izvor: Poslovne statistike, turizam, januar 2025. godine.

¹⁰ Podaci o broju zaposlenih lica za Bosnu i Hercegovinu do septembra 2024. godine su konačni, a nakon toga podaci su privremeni. U Republici Srpskoj podaci o broju zaposlenih lica se objavljuju za mart i septembar svake godine.

umjetnosti, zabave i rekreacije (19,7% g/g), trgovine na veliko i malo, popravka motornih vozila i motocikala (18,9% g/g) te administrativnih i pomoćnih uslužnih djelatnosti (18,4% g/g).

Kretanje prosječne neto plate po entitetima predstavljeno je u tabeli ispod.

Tabela 6: Prosječna neto plata (u KM) i nom. stope rasta u odnosu na isti period prethodne godine

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
I-XII 2024	1.381	9,4%	1.373	8,9%	1.404	10,2%
I-2025	1.508	13,5%	1.546	15,5%	1.434	9,3%
II-2025	1.506	12,6%	1.525	16,0%	1.475	6,0%

Izvor: Agencija za statistiku Bosne i Hercegovine, Federalni zavod za statistiku Federacije Bosne i Hercegovine, Republički zavod za statistiku Republike Srpske

U Bosni i Hercegovini prosječna samostalna penzija u martu 2025. godine je uvećana za 3,8% g/g i iznosila je oko 685¹¹ KM što je podstaknuto uvećanjem penzija u oba entiteta.¹² Najniža penzija u Federaciji Bosne i Hercegovine u martu 2025. godine nije se mijenjala u odnosu na prethodni mjesec i iznosila je 573,5 KM, a u Republici Srpskoj najniža penzija je iznosila je 318,6¹³ KM za penzijski staž do 15. godina. Prosječne penzije u entitetima su predstavljene u tabeli ispod. Ukupan broj penzionera koji prima samostalnu penziju u Bosni i Hercegovini u martu 2025. godine iznosio je 658,7 hiljada i veći je za 1,8% u odnosu na mart 2024. godine.¹⁴

Tabela 7: Prosječna samostalna penzija (u KM)

Period	Bosna i Hercegovina	rast g/g	Federacija Bosne i Hercegovine	rast g/g	Republika Srpska	rast g/g
XII-2024	667,5	8,2%	724,6	7,3%	594,4	9,8%
I-2025	683,7	3,8%	725,2	2,1%	630,3	6,5%
II-2025	684,0	3,8%	725,3	2,1%	630,9	6,6%
III-2025	684,7	3,8%	726,4	2,1%	631,3	6,6%

Izvor: Federalni zavod za penzijsko i invalidsko osiguranje Federacije Bosne i Hercegovine, Fond za penzijsko i invalidsko osiguranje Republike Srpske

2. Javne finansije

U prva tri mjeseca 2025. nastavljani su pozitivni trendovi u naplati ukupnih javnih prihoda. Prema trenutno raspoloživim podacima, u Bosni i Hercegovini ukupno je prikupljeno oko 6,0 milijardi KM javnih prihoda, po osnovu indirektnih i direktnih poreza, socijalnih doprinosa, taksi, kazni i naknada. Time su ukupni javni prihodi, u poređenju sa istim periodom 2024. godine, veći za oko 7,3%. Ukoliko bi se posmatrali javni prihodi na mjesečnom nivou, uočava

¹¹ Prosječna samostalna penzija u Bosni i Hercegovini je izračunata na osnovu prosječnih samostalnih mjesečnih penzija ponderisanih udjelom ukupnog broja penzionera u svakom od entiteta u ukupnom broju penzionera. Uzme li se u obzir i broj korisnika srazmjerne penzije u Federaciji Bosne i Hercegovine prosječna penzija u Bosni i Hercegovini iznosi oko 627 KM. Podaci o srazmjernim penzijama u Republici Srpskoj nisu objavljeni u statističkom biltenu.

¹² Penzije u oba entiteta su uvećane tokom 2024. godine (detaljnije u Informaciji za decembar 2024. godine). Pored toga, u Republici Srpskoj penzije ostvarene do 31. decembra 2024. godine svim korisnicima prava usklađuju se od 01. januara 2025. godine i povećavaju u ukupnom iznosu za 6%. Izvor: Fond za penzijsko i invalidsko osiguranje Republike Srpske.

¹³ U Republici Srpskoj za penzijski staž 15-20 godina najniža penzija je iznosila 382,40 KM, za penzijski staž 20-30 godina iznosila je 446,15 KM, za penzijski staž 30-40 godina iznosila je 509,94 KM i za penzijski staž 40 i više godina najniža penzija je iznosila 637,43 KM.

¹⁴ Broj penzionera u Bosni i Hercegovini u analizi predstavlja zbir penzionera koji primaju samostalne penzije od Federalnog zavoda za penzijsko i invalidsko osiguranje i Fonda za penzijsko i invalidsko osiguranje Republike Srpske bez obzira na mjesto prebivališta (u ili izvan Bosne i Hercegovine). Uzme li se u obzir i broj korisnika srazmjerne penzije u Federaciji Bosne i Hercegovine ukupan broj penzionera u Bosni i Hercegovini iznosi oko 743,9 hiljada. Podaci o srazmjernim penzijama u Republici Srpskoj nisu objavljeni u statističkom biltenu.

se da su prihodi koje su naplatile entitetske poreske uprave ostvarile negativnu stopu rasta prihoda od direktnih poreza, uz rast ostalih kategorija prihoda. Istovremeno, ukupni prihodi od indirektnih poreza rasli značajno višom stopom od one koja je bila ostvarena u prethodna dva mjeseca. Zahvaljujući rastu prihoda od indirektnih poreza, ukupni javni prihodi u mjesecu martu 2025. godine su ostvarili stopu rasta od oko 9% g/g, odnosno naplaćeno je oko 2,2 milijarde prihoda.

Indirektni porezi u Bosni i Hercegovini

Od 01.01.2025. na snazi je Odluka o utvrđivanju posebne i minimalne akcize na cigarete i duvan za pušenje za 2025. godinu¹⁵.

Naplaćeni prihodi. Uprava za indirektno oporezivanje Bosne i Hercegovine (dalje u tekstu UIO) tokom mjeseca marta posmatrane godine je ukupno naplatila oko 949,5 miliona KM bruto prihoda od indirektnih poreza, čime je ostvaren značajan rast u poređenju sa istim mjesecom prethodne godine, ali i sa prihodima koji su prikupljeni u prethodna dva mjeseca 2025. godine. Rast prihoda, a posebno u martu mjesecu, se svakako odrazio na kretanje prihoda u kumulativu. U periodu januar- mart UIO je ukupno prikupila oko 2,8 milijardi KM javnih prihoda, što je za oko 4,6% više nego u istom periodu prethodne godine. Značajno smanjenje povrata novčanih sredstava sa Jedinstvenog računa UIO (JR UIO), tokom marta mjeseca, ublažilo je efekat povrata i samim tim uticao na neto naplatu, koja je ostvarila rast od oko 5,0% g/g.

Pozitivan doprinos stopi rasta neto prihoda od indirektnih poreza dale su sve kategorije prihoda: porez na dodatu vrijednost od 3,8 p.p. (u daljem tekstu PDV), prihodi od akciza 0,6 p.p., prihodi carina sa po 0,6 p.p..

Tabela 8: Naplata i raspodjela prihoda od indirektnih poreza (rast g/g u % ako nije drugačije naznačeno)

	struktura 2025	jan-mar 2024	jan-mar 2025	jan 2025	feb 2025	mar 2025
Bruto prihodi - prikupljeno	100,0	8,3	4,6	1,2	3,7	8,8
<i>Povrati</i>	<i>18,9</i>	<i>-6,8</i>	<i>3,0</i>	<i>7,7</i>	<i>22,5</i>	<i>-15,8</i>
Neto prihodi - prikupljeno	81,1	12,8	5,0	-0,3	-0,3	16,0
<i>PDV</i>	<i>53,9</i>	<i>13,7</i>	<i>5,6</i>	<i>0,9</i>	<i>-0,3</i>	<i>18,3</i>
<i>Carine</i>	<i>5,1</i>	<i>15,1</i>	<i>10,0</i>	<i>18,8</i>	<i>6,6</i>	<i>7,4</i>
<i>Akcize</i>	<i>15,2</i>	<i>9,6</i>	<i>3,4</i>	<i>-7,0</i>	<i>-0,2</i>	<i>16,4</i>
<i>Putarine</i>	<i>6,3</i>	<i>12,0</i>	<i>0,6</i>	<i>-7,5</i>	<i>-1,9</i>	<i>3,7</i>
<i>Ostali prihodi</i>	<i>0,2</i>	<i>24,9</i>	<i>-8,7</i>	<i>9,2</i>	<i>-6,8</i>	<i>-21,4</i>
<i>Neusklađeni prihodi</i>	<i>0,3</i>	<i>3,8</i>	<i>-2,0</i>	<i>0,6</i>	<i>-39,1</i>	<i>81,5</i>
Raspoloživo za raspodjelu	100,0	8,3	2,4	-0,5	1,9	9,7
<i>Minimalne rezerve</i>	<i>19,3</i>	<i>-6,6</i>	<i>2,1</i>	<i>7,3</i>	<i>19,4</i>	<i>-14,6</i>
Budžeti	80,7	12,9	2,5	-2,4	-1,9	17,0
Servisiranje vanjskog duga	12,2	-1,2	5,9	0,9	20,3	-2,5
<i>Federacija Bosne i Hercegovine</i>	<i>8,1</i>	<i>-1,4</i>	<i>5,0</i>	<i>0,1</i>	<i>20,2</i>	<i>-3,6</i>
<i>Republika Srpska</i>	<i>3,9</i>	<i>-1,9</i>	<i>8,5</i>	<i>2,9</i>	<i>20,5</i>	<i>1,6</i>
<i>Brčko Distrikt</i>	<i>0,1</i>	<i>29,7</i>	<i>-6,6</i>	<i>-17,4</i>	<i>21,1</i>	<i>-5,6</i>
Raspodjeljeno nakon servisiranja vanjskog duga	68,5	16,1	1,8	-3,2	-5,5	20,4
<i>Institucije Bosne i Hercegovine</i>	<i>9,2</i>	<i>16,5</i>	<i>-2,9</i>	<i>-1,3</i>	<i>-6,0</i>	<i>-1,3</i>
<i>Federacija Bosne i Hercegovine</i>	<i>36,1</i>	<i>15,2</i>	<i>2,9</i>	<i>-3,3</i>	<i>-5,5</i>	<i>25,4</i>
<i>Republika Srpska</i>	<i>20,9</i>	<i>18,1</i>	<i>1,6</i>	<i>-3,9</i>	<i>-6,0</i>	<i>21,7</i>
<i>Brčko Distrikt</i>	<i>2,4</i>	<i>11,2</i>	<i>5,7</i>	<i>-2,0</i>	<i>0,4</i>	<i>25,4</i>

Izvor: UIO Bosne i Hercegovine

¹⁵ Odluka o utvrđivanju posebne i minimalne akcize na cigarete i iznos akcize na duvan za pušenje za 2025. godinu („Službeni glasnik BiH“, broj 84/24), a koja se primjenjuje od 01.01.2025. godine. Odlukom je definisano da se od 01.01.2025. godine, na cigarete i duvan za pušenje plaća sljedeća akciza i to :

a) proporcionalna akciza, po stopi od 42% na osnovicu utvrđenu u skladu sa članom 15. stav (1) tačka b) Zakona o akcizama u Bosni i Hercegovini ("Službeni glasnik BiH", br. 49/09, 49/14, 60/14, 91/17 i 50/22, u daljnjem tekstu: Zakon) i
b) specifična akciza u iznosu od 82,50 KM za 1.000 komada, odnosno 1,65 KM za pakovanje cigareta od 20 komada
Akciza na duvan za pušenje utvrđuje se u visini od 80% minimalne akcize, utvrđene u članu 3. stav (3) ove odluke i iznosi 143,20 KM po kilogramu.

<http://www.sluzbenilist.ba/page/akt/pS4G2Sohz4nh78h777kohz4nh78h77c=>

PDV. Bruto prihodi od PDV-a, tokom prva tri mjeseca 2025. godine, su iznosili oko 2,0 milijarde KM, što je za 5,1% više nego u istom periodu prethodne godine. Neto prihodi po osnovu PDV-a, tokom istog perioda, su iznosili oko 1,5 milijarde KM, čime su ostvarili rast od oko 5,6% U periodu januar-mart 2025. godine, prihodi od PDV-a po osnovu uvoza roba veći su za oko 6,1% g/g, dok su prihodi naplaćeni iz prometa domaćih roba i usluga veći za oko 3,7% g/g.

Akcize. Nakon smanjenja prihoda od akciza u prethodna dva mjeseca, u martu mjesecu su isti ostvarili značajan rast od oko 16,4%, što se svakako odrazilo na kumulativ perioda. Po osnovu akciza, u posmatranom periodu 2025. godine, ukupno je naplaćeno oko 397 miliona KM bruto prihoda, što je za oko 3,4% više u poređenju sa istim periodom prethodne godine. Prihodi od uvoza akciza su veći za oko 2,2% g/g. Sa druge strane, domaće akcize su manje za oko 5,6% g/g. Ukupni prihodi od akciza na naftu i derivate nafte su ostali nepromijenjeni u poređenju sa istim periodom prethodne godine (0,1% g/g), prihodi od akciza na duvan i duvanske prerađevine viši su za oko 3,6% g/g, dok su prihodi od ostalih akciza niži za oko 2,0% g/g. Na smanjenje kategorije ostalih akciza su uticali smanjeni prihodi od uvezenog piva, kao i prometa domaćih alkoholnih i bezalkoholnih pića i domaćih vina.

Putarine. Ukupno naplaćeni prihodi od putarina u periodu januar- mart 2025. godine iznosili su oko 158 miliona KM. Naplata prihoda od putarine uglavnom prati naplatu akciza na naftu i naftne derivate, sa određenim razlikama koje potiču od različitih osnovica na koje se obračunava i plaća putarina, odnosno akcize na naftu i derivate nafte. Tokom posmatranog perioda navedeni prihodi su ostvarili povećanje od oko 0,6% g/g.

Carine. Neto prihodi od carinskih dažbina u periodu januar- mart 2025. godine su iznosili oko 148 miliona KM. U poređenju sa istim periodom prethodne godine navedeni prihodi su veći za oko 10,0% g/g. Visoka stopa rasta prihoda od carina se može povezati sa porastom uvoza iz trećih zemalja, a koji se uvoze u Bosnu i Hercegovinu.

Raspoređeni prihodi. U periodu januar- mart 2025. godine, ukupni prihodi raspoloživi za raspodjelu su iznosili oko 2,8 milijardi KM. Nakon izdvajanja sredstava za izgradnju autoputeva i izgradnju i rekonstrukciju drugih puteva u Bosni i Hercegovini u iznosu od oko 102 miliona KM, minimalne rezerve u iznosu od oko 541 milion KM i sredstava za finansiranje institucija Bosne i Hercegovine u iznosu od 243 miliona KM, UIO Bosne i Hercegovine, je izvršila raspored preostalih sredstava u iznosu od oko 1,9 milijardi KM krajnjim korisnicima prema važećim koeficijentima¹⁶. Od tog iznosa Federaciji Bosne i Hercegovine je doznačeno ukupno oko 1,2 milijarde KM (za servis vanjskog duga oko 238 miliona KM), Republici Srpskoj oko 644 miliona KM (za servis vanjskog duga oko 112 miliona KM) i Brčko Distriktu oko 66 miliona KM (za servis vanjskog duga 4,7 miliona KM). U poređenju sa istim periodom prethodne godine raspoređena sredstva sa jedinstvenog računa UIO za servis vanjskog duga su veća za oko 5,9% g/g, a raspoređena sredstva krajnjim korisnicima, nakon servisiranja obaveza vanjskog duga za 1,8%.

¹⁶ Odlukom Upravnog odbora UIO Bosne i Hercegovine, broj: 02-02-15-3-1/23 od 04.09.2023. godine, utvrđeni su privremeni koeficijenti raspodjele sredstava sa Jedinstvenog računa za period jul-septembar 2023. godine, i isti iznose: BiH 62,01%, RS 34,44%, Brčko Distrikt BiH 3,55%.

Prihodi od direktnih poreza, doprinosa i neporeskih prihoda

Od januara 2025. godine, u primjeni su zakonski akti i mjere koje su donijele i primjenjuju, obje entitetske vlade, koje će se u narednom periodu svakako odraziti na prihode entitetskih poreskih uprava, a o čemu je detaljnije pisano u prethodnim Informacijama¹⁷.

U mjesecu martu 2025. godine, prihodi od direktnih poreza, usljed značajnog smanjenja prihoda od poreza na dobit su ostvarili negativnu stopu rasta. Ostale kategorije prihoda iz nadležnosti entitetskih poreskih uprava su rasli, čime je neutralizovano smanjenje poreskih prihoda. Entitetske poreske uprave su u periodu januar- mart 2025. godine, ukupno prikupile oko 3,3 milijarde KM javnih prihoda, iz svojih nadležnosti i ostvarile stopu rasta od oko 9,6%. Detalji o naplaćenim prihodima slijede u tabeli ispod.

Tabela 9: Prihodi od direktnih poreza, doprinosa, taksi, naknada i kazni u periodu januar- mart

Naziv prihoda	Federacija Bosne i Hercegovine			Republika Srpska			Bosna i Hercegovina		
	miliona KM		rast u %	miliona KM		rast u %	miliona KM		rast u %
	2024	2025		2024	2025		2024	2025	
Direktni porezi	412,7	451,7	9,5	312,3	309,4	-0,9	725,0	761,1	5,0
Porez na dohodak	189,6	227,3	19,9	101,5	118,2	16,4	291,1	345,5	18,7
Porez na dobit	180,4	177,9	-1,4	203,5	184,2	-9,5	383,9	362,1	-5,7
Porezi građana	42,6	46,4	8,9	7,2	7,0	-3,1	49,9	53,5	7,2
Ostali porezi	0,1	0,1	-9,9	0,0	0,0	-	0,1	0,1	-9,9
Takse, kazne i naknade	226,7	223,3	-1,5	141,9	147,4	3,8	368,6	370,7	0,6
Doprinosi	1.305,9	1.502,4	15,0	594,1	646,9	8,9	1.899,9	2.149,3	13,1
PIO	733,8	838,7	14,3	356,2	387,4	8,8	1.090,0	1.226,1	12,5
Zdravstvo	511,9	594,4	16,1	194,8	212,5	9,1	706,7	806,9	14,2
Nezaposleni	60,1	69,3	15,3	11,0	12,0	9,5	71,1	81,4	14,4
Dječija zaštita	0,0	0,0	-	29,7	32,3	8,7	29,7	32,3	8,7
Zapošljavanje invalida	0,0	0,0	-	2,4	2,7	12,2	2,4	2,7	12,2
Ostali prihodi	0,1	0,3	-	0,0	0,0	-	0,1	0,3	-
UKUPNO	1.945,4	2.177,7	11,9	1.048,3	1.103,7	5,3	2.993,7	3.281,4	9,6

Izvor: entitetske poreske uprave

Socijalni doprinosi. Ukupno prikupljeni prihodi po osnovu socijalnih doprinosa, za prva tri mjeseca 2025. godine, su iznosili oko 2,1 milijardu KM, čime su u ostvarili rast od oko 13,1% g/g. Posmatrajući pojedinačne kategorije prihoda od doprinosa, uočava se da one bilježe ujednačene stope rasta, što se može vidjeti iz tabele iznad. Dominantna kategorija ovih prihoda jesu prihodi od doprinosa za penzijsko i invalidsko osiguranje (PIO), koji su zabilježili stopu rasta od oko 12,5% g/g. Takođe, na dvocifren rast prihoda od doprinosa značajno se odrazilo povećanje minimalne plate u Federaciji Bosne i Hercegovine, gdje je stopa rasta ove kategorije posle dugo vremena ostvarila dvocifreni broj.

¹⁷ <https://fbihvlada.gov.ba/bs/utvrdena-najniza-plata-za-2025-godinu-u-iznosu-od-1000-km>

<https://fbihvlada.gov.ba/bs/11-uredba-o-isplati-pomoci-od-strane-poslodavca>;

<https://www.pufbih.ba/v1/novosti/3181/obavijest-u-vezi-primjene-uredbe-o-isplati-pomoi-radnicima-od-strane-poslodavca>

<https://erp.slglasnik.org/erp/slglasnik.org/rs/sgrs/vlada-republike-srpske/odluka/2025/6/15900>

1) Najniža plata u Republici Srpskoj utvrđuje se u bruto iznosu od 1.344,26 KM, odnosno u neto iznosu od 900,00 KM.

2) Najniža plata za poslove za čije obavljanje se zahtijeva najmanje stečeno srednje obrazovanje u trajanju od tri godine utvrđuje se u bruto iznosu od 1.426,23 KM, odnosno u neto iznosu od 950,00 KM.

3) Najniža plata za poslove za čije obavljanje se zahtijeva najmanje stečeno srednje obrazovanje u trajanju od četiri godine utvrđuje se u bruto iznosu od 1.508,20 KM, odnosno u neto iznosu od 1.000,00 KM.

4) Najniža plata za poslove za čije obavljanje se zahtijeva najmanje stečeno više obrazovanje utvrđuje se u bruto iznosu od 2.000,00 KM, odnosno u neto iznosu od 1.300,00 KM.

Direktni porezi. Prihodi po ovom osnovu na nivou Bosne i Hercegovine, tokom perioda januar-mart 2025. godine, su zabilježili usporenje stope rasta. Iako su prihodi po osnovu poreza na dohodak ostvarili značajnu dvocifrenu stopu rasta, kao rezultat povećanja plata, na navedeno usporenje rasta se u značajnoj mjeri odrazilo smanjenje prihoda po osnovu poreza na dobit. U oba entiteta (iako je zakonski rok za uplatu poreza na dobit mart mjesec) u mjesecu martu je zabilježeno smanjenje ove kategorije prihoda, što se odrazilo i na kumulativ perioda. Iako podaci poreskih uprava ukazuju na povećanje privrednih subjekata (prema broju novoregistrovanih poslovnih subjekata), pretpostavka je da je njihovo poslovanje negativno. U posmatranom periodu po osnovu direktnih poreza ukupno je naplaćeno oko 761 milion KM.

Takse, kazne i naknade. Po osnovu različitih taksi, naknada i kazni, tokom posmatranog perioda 2025. godine, ukupno je naplaćeno oko 371 milion KM, što je za svega 0,6% više nego u istom periodu prethodne godine. Na rast prihoda u navedenoj kategoriji najveći doprinos su imali povećani prihodi po osnovi naknada za priređivanje igara na sreću, koncesionih naknada (naknada za korištenje elektroenergetskih objekata i raznih kazni (najvećim dijelom, prekršajne kazne).

3. Cijene, monetarni i finansijski sektor

Cijene

U Bosni i Hercegovini u martu 2025. godine je registrovan rast cijena od 3,2% u poređenju sa martom 2024. godine. U prosjeku perioda I-III 2025. godine inflacija je iznosila 3,4%. Kretanje inflacije po entitetima je predstavljeno u tabeli ispod. Inflacija u EU 27 u martu 2025. godine je iznosila 2,5% g/g odnosno u periodu I-III 2025. godine je iznosila 2,7% g/g.¹⁸

Tabela 10: Indeks potrošačkih cijena (poređenje sa istim periodom prethodne godine)

Period	Bosna i Hercegovina	Federacija Bosne i Hercegovine	Republika Srpska
I-XII 2024	101,7	101,4	101,8
I-2025	103,3	103,3	103,2
II-2025	103,5	103,4	103,6
III-2025	103,2	103,0	103,3
I-III 2025	103,4	103,2	103,3

Izvor: Agencija za statistiku Bosne i Hercegovine, Federalni zavod za statistiku Federacije Bosne i Hercegovine, Republički zavod za statistiku Republike Srpske

Najznačajniji doprinos rastu ukupnog nivoa cijena u periodu I-III 2025. godine bio je u odjeljku hrane i bezalkoholnih pića. Nešto brži rast cijena takođe je registrovan i u odjeljcima zdravstva, alkoholnih pića i duvana, restorana i hotela te ostalih dobara i usluga, ali je njihov doprinos rastu ukupne inflacije bio manji u odnosu na odjeljak hrane. Cijene u odjeljku koji zauzima najveći udio (hrana i bezalkoholna pića) su u periodu I-III 2025. godine bile veće za 7,1% g/g uz doprinos od preko 2/3 ukupnoj inflaciji.

Cijene u odjeljku alkoholnih pića i duvana u periodu I-III 2025. godine su uvećane za 4,6% g/g. Od 1. januara 2025. godine stupila je na snagu Odluka o utvrđivanju specifične i minimalne


¹⁸ Izvor: EUROSTAT

akcize¹⁹ na cigarete i duvan za 2025. godinu. Pored toga, u februaru je došlo do poskupljenja cigareta od strane pojedinih proizvođača što je uticalo na rast cijena ovih proizvoda. U periodu I-III 2025. godine primjetan je rast cijena usluga pa su u odjeljku ostalih dobara i usluga cijene narasle za 3,2% g/g, zdravstva za 6,7% g/g, restorana i hotela za 6,3% g/g. U odjeljku stanovanja, vode, električne energije, plina i drugih energenata cijene se nisu značajno mijenjale u periodu I-III 2025. godine (0,6% g/g) pa je njihov doprinos rastu ukupne inflacije u Bosni i Hercegovini bio zanemariv.

S druge strane, smanjenje cijena registrovano je u odjeljku prevoza od 1,4% g/g (kroz smanjenje cijena nafte), kao i odjeće i obuće (8,9% g/g) te odjeljku namještaja, kućnih uređaja i redovnom održavanju kuće (0,5% g/g) što je djelimično usporilo rast inflacije u Bosni i Hercegovini.

U prvom kvartalu 2025. godine registrovano je smanjenje cijena sirove nafte (grafikon ispod). Prema podacima Svjetske banke u martu 2025. godine cijena sirove nafte bila je niža za 15,4% u odnosu na isti mjesec prethodne godine i iznosila je 70,7 \$/barelu. Suprotno, u istom mjesecu cijena prirodnog gasa (Evropa) bila je znatno veća u odnosu na mart 2024. godine (54,7%). Indeks cijena hrane na svjetskom tržištu u martu 2025. godine bio je niži u poređenju sa martom 2024. godine (-5,8%) što se može vidjeti na grafikonu ispod.

Grafikon 7: Kretanje cijena sirove nafte, prirodnog gasa i indeksa hrane na svjetskom tržištu



Izvor: Svjetska banka

Pregled indeksa potrošačkih cijena po odjeljcima prema namjeni potrošnje predstavljen je u tabeli ispod.

¹⁹ Upravni odbor Uprave za indirektno oporezivanje donio je Odluku o utvrđivanju specifične i minimalne akcize na cigarete i iznos akcize na duvan za pušenje za 2025. godinu. Minimalna akciza za pakovanje cigareta od 20 komada iznosi 3,58 KM (u 2024. godini je iznosila 3,46 KM), a specifična akciza iznosi 1,65 KM za pakovanje cigareta od 20 komada (ostala je ista u odnosu na 2024. godinu). Akciza na duvan za pušenje utvrđuje se u visini od 80% minimalne akcize na cigarete utvrđene u članu 3. stav (3) ove odluke iznosi 143,20 KM po kilogramu (u 2024. godini je iznosila 138,4 KM po kilogramu). Izvor: Odluka o utvrđivanju specifične i minimalne akcize na cigarete i iznos akcize na duvan za pušenje za 2025. godinu.

Tabela 11: Indeks potrošačkih cijena u Bosni i Hercegovini

Odjeljak	I-XII 2024	I 2025	II 2025	III 2025	I-III 2025
	I-XII 2023	I 2024	II 2024	III 2024	I-III 2024
00 Ukupan indeks	101,7	103,3	103,5	103,2	103,4
01 Hrana i bezalkoholna pića	102,1	106,3	107,2	107,8	107,1
02 Alkoholna pića i duvan	104,2	104,3	105,6	103,9	104,6
03 Odjeća i obuća	92,5	91,3	91,1	90,8	91,1
04 Stanovanje, voda, el. energija, plin i dr. energenti	100,1	100,8	100,4	100,6	100,6
05 Namještaj, kućni uređaji i redovno održavanje kuće	101,2	99,6	100,0	98,9	99,5
06 Zdravstvo	103,6	107,0	106,8	106,3	106,7
07 Prevoz	99,2	99,8	99,2	96,9	98,6
08 Komunikacije	101,3	100,3	100,2	100,2	100,3
09 Rekreacija i kultura	103,6	103,4	103,4	103,1	103,3
10 Obrazovanje	101,4	100,5	100,6	100,6	100,6
11 Restorani i hoteli	107,2	107,1	105,9	105,8	106,3
12 Ostala dobra i usluge	105,3	103,4	103,3	102,8	103,2

Izvor: Agencija za statistiku Bosne i Hercegovine

Monetarni sektor

Prema podacima Centralne banke Bosne i Hercegovine (u daljem tekstu CBBiH) ukupna novčana masa (M2) na kraju marta 2025. godine iznosila je oko 39,1 mlrd. KM i uvećana je za 7,5% u odnosu na isti mjesec prethodne godine. Istovremeno, rezervni novac (u daljem tekstu M0) iznosio je oko 14,7 mlrd. KM što je za 2,6% više u odnosu na isti mjesec prethodne godine. Prosječna stopa obavezne²⁰ rezerve na kraju marta 2025. godine nije se mijenjala i iznosila je 10%. Bruto devizne rezerve iznosile su oko 16,9 mlrd. KM i veće su za 5,4% u odnosu na isti mjesec prethodne godine.

Bankarski sektor


Prema podacima CBBiH ukupni plasirani krediti na kraju marta 2025. godine uvećani su za 10% u odnosu na isti mjesec prethodne godine i iznosili su 26,5 mlrd. KM. Krediti stanovništvu su uvećani za 9,8% g/g, dok su krediti nefinansijskim preduzećima uvećani za 8,7% g/g. Ukupni depoziti na kraju marta 2025. godine su uvećani za 6,3% u odnosu na isti mjesec prethodne godine i dostigli su oko 33,8 mlrd. KM. Depoziti stanovništva su uvećani za 9,1% g/g, dok su depoziti nefinansijskih preduzeća uvećani za 4,9% g/g.

Berze u Bosni i Hercegovini

Promet na sarajevskoj berzi (u daljem tekstu SASE) u mjesecu martu 2025. godine je sa dostignutih 205,8 mil. KM bio 3,3 puta veći u odnosu na isti period u prošloj godini. Ovaj iznos ujedno predstavlja 73,7% ukupnog ostvarenog prometa u Bosni i Hercegovini. U ovom mjesecu na SASE je putem javne ponude obveznica za emitente prikupljeno oko 199 mil. i oko 39 mil. KM trezorskih zapisa.

²⁰ Prosječna stopa obavezne rezerve = Prosječne obavezne rezerve/osnovica za obračun obavezne rezerve.

Grafikon 8: Promet na SASE u milionima KM



Izvor: SASE

Promet na Banjalučkoj berzi (u daljem tekstu BLSE) u mjesecu martu 2025. godine je dostigao 73,4 mil. KM uz negativnu stopu rasta od 34,6% g/g. Ovaj iznos predstavlja 26,3% ostvarenog prometa u Bosni i Hercegovini. Na BLSE je u ovom mjesecu za emitente održana primarna emisija obveznica u iznosu od 57,5 mil. KM i trezorskih zapisa 13,5 mil. KM.

Grafikon 9: Promet na BLSE u milionima KM



Izvor: BLSE


Ukupan promet na SASE i BLSE je dostigao 279,2 mil. KM uz negativnu stopu rasta od 60,7% g/g. U ovom mjesecu je putem primarne emisija obveznica i trezorskih zapisa za emitenta prikupljeno 269,9 mil. KM.

Tabela 12: Ukupna kapitalizacija promet (u KM) na kraju perioda na SASE i BLSE

Godina	SASE	BLSE	UKUPNO
Mar-23	6.262.072.034,8	4.704.823.044,1	10.966.895.078,9
Mar-24	6.268.559.273,0	5.300.814.393,2	11.569.373.666,2
Mar-25	7.872.269.977,77	5.102.561.572	12.974.831.549,8

Izvor: SASE i BLSE

Ukupna kapitalizacija na (SASE+BLSE) kraju mjeseca marta 2025.god. je uz stopu rasta od 12,1 % g/g dostigla oko 13 mlrd. KM. Odnos kapitalizacije na SASE prema BLSE na kraju ovog perioda je bio 60,7% prema 39,3%. Ukupna kapitalizacija na SASE na kraju mjeseca marta je dostigla 7,9 mlrd. KM uz stopu rasta od 25,6% g/g. Kapitalizacija na BLSE na kraju marta mjeseca 2025. godine je dostigla 5,1 mlrd. KM uz negativnu stopu rasta od 3,7% g/g.




4. Vanjski sektor

Vanjskotrgovinska robna razmjena

U proteklih nekoliko godina Bosna i Hercegovina je bilježila kontinuirani trend rasta vanjskotrgovinske robne razmjene, što se u pojedinim godinama manifestovalo i dvocifrenim stopama rasta izvoza i uvoza roba. Međutim u 2024. godini ovaj pozitivan trend je zaustavljen obzirom da je ukupna vanjskotrgovinska robna razmjena u Bosni i Hercegovini stagnirala. Tako su glavne karakteristike vanjskotrgovinske robne razmjene u 2024. godine bile, stagnacija ukupnog obima razmjene, smanjenje izvoza roba, povećanje uvoza roba i povećanje vanjskotrgovinskog deficita.²¹ Prema trenutno raspoloživim podacima o vanjskotrgovinskoj robnoj razmjeni u Bosni i Hercegovini za 2025. godinu čini se da je došlo do zaustavljanja ovog negativnog trenda. Naime, nakon dugo vremena u Bosni i Hercegovini je došlo do istovremenog rasta izvoza i uvoza roba, što je rezultiralo povećanjem ukupnog obima vanjskotrgovinske u odnosu na isti period prethodne godine. Pregled kretanja vanjskotrgovinskih pokazatelja u Bosni i Hercegovini za period januar-mart 2025. godine prikazan je na grafikonu ispod.

Grafikon 11: Vanjskotrgovinska robna razmjena u Bosni i Hercegovini za januar-mart 2025. godine (nominalni iznosi i stope rasta g/g)



Izvor: BHAS

²¹Agencija za statistiku Bosne i Hercegovine, Saopštenje, „Vanjskotrgovinska robna razmjena u Bosni i Hercegovini za decembar 2024. godine-prethodni podaci“, 20.01.2025. godine.

Prema trenutno raspoloživim podacima BHAS-a za period januar-mart 2025. godine izvoz roba iz Bosne i Hercegovine iznosio je preko 4,1 milijardu KM što predstavlja nominalno povećanje od 262 miliona KM odnosno 6,8% u odnosu na isti period prethodne godine.²² Posmatrano na mjesečnom nivou, izvoz roba iz Bosne i Hercegovine već 6 mjeseci zaredom bilježi pozitivne stope rasta što bi moglo ukazivati da su negativni trendovi iz prethodne godine zaustavljeni. Tako je stopa rasta izvoza roba u martu 2025. godine u odnosu na isti period prethodne godine iznosila 8,2%.

Ako se izvoz roba iz Bosne i Hercegovine za period januar-mart posmatra detaljnije po proizvodima, vidljivo je da su najznačajnija povećanja izvoza roba registrirana u okviru izvoza baznih metala 39% (2,5 p.p), ruda metala gdje je izvoz višestruko uvećan a doprinos rastu ukupnog izvoza iznosio (1,4 p.p), gotovih metalnih proizvoda 9,1% (1,1 p.p), el. energije 24,5% (1,1 p.p), autokomponenti 19% (0,8 p.p), prehrambenih proizvoda 13,7% (0,8 p.p) i dr. S druge strane, u periodu januar-mart 2025. godine najznačajnija smanjenja su zabilježena u okviru izvoza koksa 63,8% (-1,3 p.p), mašina i uređaja 7,1% (-0,6 p.p), odjeće 10,3% (-0,5 p.p) i namještaja 6,9% (-0,5 p.p). Ako se izvoz roba iz Bosne i Hercegovine u K1 2025. godine posmatra po glavnim trgovinskim partnerima vidljivo je da najviše robe izvezeno na tržište zemalja EU u vrijednosti od preko 3 milijarde KM što predstavlja povećanje od 5,2% u odnosu na isti period prethodne godine. S druge strane, izvoz roba iz Bosne i Hercegovine u zemlje CEFTA-e iznosio je 688 miliona KM što predstavlja povećanja od 13,2%. Ako se robni izvoz iz Bosne i Hercegovine u periodu januar-mart 2025. godine posmatra po zemljama vidljivo je da su najznačajnija povećanja zabilježena prilikom izvoza u Hrvatsku 21% (3,2 p.p), Srbiju 15,8% (1,6 p.p), Austriju 4,6% (0,4 p.p), dok su najznačajnija smanjenja registrirana prilikom izvoza u Njemačku 3,5% (-0,6 p.p), Italiju 1,9% (-0,2 p.p), Tursku 3,7% (-0,1 p.p), dok je izvoz roba u Sloveniju stagnirao.

S druge strane, uvoz roba u Bosnu i Hercegovinu u K1 2025. godine iznosio je skoro 7,2 milijardi KM što predstavlja nominalni rast od 373 miliona KM odnosno 5,5% u odnosu na isti period prethodne godine. Posmatrano na mjesečnom nivou, uvoz roba u Bosnu i Hercegovinu u martu 2025. godine u poređenju sa istim mjesecom prethodne godine uvećan je za 4%. Ovaj nastavak trenda rasta uvoza je veoma značajan u kontekstu kretanja privatne potrošnje i investicija odnosno domaće tražnja u zemlji koja predstavlja glavno uporište ekonomskog rasta u zemlji. Posmatrano po proizvodima, u periodu januar-mart 2025. godine najznačajnija povećanja uvoza su registrirana u okviru uvoza električne energije koji je značajno uvećan i doprinosio je povećanju ukupnog uvoza sa (3,0 p.p), zatim baznih metala 11,5% (1,0 p.p), hemijskih proizvoda 9,2% (0,7 p.p), gotovih metalnih proizvoda 11,0% (0,4 p.p), te prehrambenih proizvoda 3,2% (0,4 p.p) i dr. S druge strane, smanjenja su zabilježena prilikom uvoza kamenog uglja 64,5% (1,4 p.p), rafiniranih naftnih derivata 8,0% (0,7 p.p), tekstila 5,2% (-0,2 p.p) i dr.

Ako se uvoz roba u Bosnu i Hercegovinu u periodu januar-mart 2025. godine posmatra po glavnim trgovinskim partnerima vidljivo je da najviše robe uvezeno sa tržišta zemalja EU u vrijednosti od skoro 4,2 milijarde KM što predstavlja povećanje od 3,1% u odnosu na isti period prethodne godine. Uvoz roba iz zemalja CEFTA-e iznosio je skoro 882 miliona KM što predstavlja povećanje od 18,6% u odnosu na isti period prethodne godine. Ako se robni uvoz u Bosnu i Hercegovinu u periodu januar-mart 2025. godini posmatra po zemljama vidljivo je da su najznačajnija povećanja istog zabilježena prilikom uvoza iz Hrvatske koji je uvećan za 61,6% uz doprinos rastu ukupnog uvoza roba od (3,8 p.p), zatim Kine 19,2% (1,7 p.p), Srbije 18,9% (1,8 p.p), Austrije 7,7% (0,3 p.p). S druge strane, najznačajnija smanjenja uvoza su

²²Agencija za statistiku Bosne i Hercegovine, Saopštenje, „Vanjskotrgovinska robna razmjena u Bosni i Hercegovini za januar-mart 2025. godine“, 20.04.2025. godine.

registrirana prilikom uvoza iz Italije 15,5% (-2,1 p.p), Njemačke 6,5% (-0,8 p.p) i Slovenije 2,0% (-0,1 p.p).

Ovakva kretanja izvoza i uvoza roba u periodu januar-mart 2025. godine rezultirala su vanjskotrgovinskim deficitom od preko 3 milijarde KM, što predstavlja povećanje od 111 miliona KM odnosno 3,8% u poređenju sa istim periodom prethodne godine. Ako se posmatra struktura robnog deficita u Bosni i Hercegovini može se zaključiti da su rafinirani naftni proizvodi, motorna vozila, farmaceutski preparati i prehrambeni proizvodi najviše doprinosili povećanju deficita. S druge strane, namještaj, metalne konstrukcije i obuća su kategorije u okviru kojih Bosna i Hercegovina ostvaruje suficit.

Ukupna pokrivenost uvoza izvozom u Bosni i Hercegovini u periodu januar-mart 2025. godine iznosila je 57,3%, pri čemu je pokrivenost sa zemljama EU iznosila 72,5% a sa zemljama CEFTA-e 77,9%. Detaljniji prikaz vanjskotrgovinske robne razmjene u Bosni i Hercegovini u periodu januar-mart 2025. godine po HS klasifikaciji prikazan je u tabeli ispod.

Tabela 13: Vanjskotrgovinska robna razmjena u Bosni i Hercegovini u periodu januar-mart 2025. godine, HS klasifikacija

Izvozi uvoz dobara klasifikovanih prema harmonizovanom sistemu kodova (HS)		IZVOZ				UVOZ				DEFICIT				
		Jan-Mar 2024	Jan-Mar 2025	2025/2024 promjena %		Jan-Mar 2024	Jan-Mar 2025	2025/2024 promjena %		Jan-Mar 2024	Jan-Mar 2025	2025/2024 promjena %		Pokrivenost uvoza izvozom
		u mil KM	u mil KM	g/g	p.p	u mil KM	u mil KM	g/g	p.p	u mil KM	u mil KM	g/g	p.p	
	UKUPNO	3854	4116	6.8	6.8	6811	7184	5.5	5.5	-2957	-3068	3.8	3.8	57.3%
1	ŽIVOTINJE I PROIZVODI PROIZVODI	53	56	6.2	0.1	233	226	-3.2	-0.1	-180	-169	-6.0	-0.4	25.0%
2	BILJNOG MASTI I ULJA	47	48	1.3	0.0	299	340	13.7	0.6	-252	-292	16.0	1.4	14.0%
3	ŽIVOTINJSKOG PREHRAMBENE	31	56	79.7	0.6	44	70	59.5	0.4	-13	-15	11.5	0.1	79.3%
4	PRERAĐEVINE PROIZVODI	120	124	3.6	0.1	606	630	3.9	0.3	-486	-505	4.0	0.7	19.7%
5	MINERALNOG PROIZVODI	328	403	22.9	1.9	899	967	7.6	1.0	-571	-564	-1.2	-0.2	41.7%
6	HEMLJSKE PLASTIČNE	284	314	10.6	0.8	613	672	9.6	0.9	-329	-358	8.8	1.0	46.7%
7	MASE, GUMA I	190	198	4.1	0.2	432	451	4.4	0.3	-242	-253	4.6	0.4	43.9%
8	KOŽA I KRZNO	20	25	29.1	0.1	60	58	-4.2	0.0	-40	-32	-20.3	-0.3	44.0%
9	DRVO I PROIZVODI OD CELULOZA,	213	209	-2.1	-0.1	98	101	3.0	0.0	115	108	-6.4	0.3	206.6%
10	PAPIR I KARTON TEKSTIL I	106	117	10.0	0.3	143	140	-2.1	0.0	-37	-23	-36.8	-0.5	83.3%
11	TEKSTILNI OBUĆA, ŠEŠIRI,	213	192	-9.9	-0.5	399	407	2.0	0.1	-186	-215	15.6	1.0	47.2%
12	KAPE I SLIČNI PROIZVODI OD	192	174	-9.2	-0.5	105	117	11.4	0.2	87	57	-34.0	1.0	149.1%
13	KAMENA, GIPSA, BISERI,	56	57	2.5	0.0	128	137	7.0	0.1	-72	-80	10.6	0.3	41.9%
14	PLEMENITI BAŽNI METALI I	15	14	-8.2	0.0	15	16	6.7	0.0	0	-3	733.3	0.1	84.4%
15	PROIZVODI OD MASINE,	661	730	10.5	1.8	852	941	10.4	1.3	-191	-211	10.3	0.7	77.6%
16	APARATI, TRANSPORTNA	694	709	2.1	0.4	1048	1057	0.9	0.1	-354	-349	-1.6	-0.2	67.0%
17	SREDSTVA I ŠATOVI, MJERNI,	160	183	14.4	0.6	558	546	-2.2	-0.2	-398	-363	-8.8	-1.2	33.5%
18	MUZIČKI I ORUŽJE I	31	34	11.7	0.1	97	120	23.7	0.3	-66	-86	29.3	0.7	28.7%
19	MUNICIJA, RAZNI	92	137	48.7	1.2	7	10	37.0	0.0	85	127	49.7	-1.4	1368.0%
20	PROIZVODI UMJETNICKA	341	335	-1.6	-0.1	165	174	5.5	0.1	176	161	-8.3	0.5	68.7%
21	DJELA,	3	0	-100.0	-0.1	0	0	-100.0	0.0	3	0	-100.0	0.1	0.0%
98	NERAZVRSTANO	0	0	0.0	0.0	0	0	0.0	0.0	0	0	0.0	0.0	0.0%

Izvor: BHAS

5. Strana direktna ulaganja

U vrijeme pisanja informacije nisu bili dostupni podaci o stranim direktnim ulaganjima za mjesec januar, februar i mart 2025. godine.

Prema posljednjim dostupnim podacima od strane CBBiH²³ SDU u Bosni i Hercegovini su u 2024. god. dostigla 2.036,8 mil. KM i bila su veća za 8,8% u odnosu na isti period u prošloj godini. Ukupne reinvestirane zarade u 2024. god. su dostigle 1.251,7 mil. KM uz stopu rasta od 24,6 % g/g. Time su sa ostvarenim učešćem od 61,5 % u ukupnim SDU bile veće za 7,8 p.p. u odnosu na isti period u prošloj 2023. godini.

Tabela 14: Strana direktna ulaganja po kvartalima i ukupno u milionima KM

Godina	K1	K2	K3	K4	K1-K4
2021.	457,4	530,1	373,3	-112,8	1.248,1
2022.	420,6	442,2	396,7	316,0	1.575,4
2023.	499,2	592,9	404,6	375,3	1.872,0
2024.	592,7	394,9	513,9	535,4	2.036,8

Izvor: CBBiH

Dana 2. avgusta 2024. agencije za ocjenu kreditnog rejtinga Standard & Poor's i Moody's Investors Service potvrdile su Bosni i Hercegovini suvereni kreditni rejting „B+ sa stabilnim izgledima“ i „B3 sa stabilnim izgledima“.

²³ BPM6_for_users_Q1_2015_Q4_2024_stan, neto finansijska pasiva

Na osnovu člana 17. Zakona o Vijeću ministara Bosne i Hercegovine („Službeni glasnik Bosne i Hercegovine“, br. 30/03, 42/03, 81/06, 94/07 i 24/08), člana 54. stava (1) tačke b) i člana 56. Poslovnika o radu Vijeća ministara Bosne i Hercegovine („Službeni glasnik BiH“, broj 22/03) Vijeće ministara Bosne i Hercegovine na _____. sjednici, održanoj _____ godine, donijelo je

ZAKLJUČAK

1. Vijeće ministara Bosne i Hercegovine usvojilo je dokument ***Informacija o kretanju makroekonomskih pokazatelja u Bosni i Hercegovini za januar – mart 2025. godine.***

broj: _____ od _____. godine.

Broj: _____, _____. godina.
S a r a j e v o

M. P. Predsjedavajuća
Vijeća ministara Bosne i Hercegovine

Borjana Krišto

Na temelju članka 17. Zakona o Vijeću ministara Bosne i Hercegovine („Službeni glasnik Bosne i Hercegovine“, br. 30/03, 42/03, 81/06, 94/07 i 24/08), članka 54. stavka (1) točke b) i članka 56. Poslovnika o radu Vijeća ministara Bosne i Hercegovine („Službeni glasnik BiH“, broj 22/03) Vijeće ministara Bosne i Hercegovine na _____. sjednici, održanoj _____ godine, donijelo je

ZAKLJUČAK

1. Vijeće ministara Bosne i Hercegovine usvojilo je dokument ***Informacija o kretanju makroekonomskih pokazatelja u Bosni i Hercegovini za siječanj – ožujak 2025. godine.***

broj: _____ od _____. godine.

Broj: _____, _____. godina.

S a r a j e v o

M. P.

Predsjedateljica
Vijeća ministara Bosne i Hercegovine

Borjana Krišto

На основу члана 17. Закона о Савјету министара Босне и Херцеговине („Службени гласник Босне и Херцеговине“, бр. 30/03, 42/03, 81/06, 94/07 и 24/08), члана 54. става (1) тачке б) и члана 56. Пословника о раду Савјета министара Босне и Херцеговине („Службени гласник БиХ“, број 22/03) Савјет министара Босне и Херцеговине на _____ сједници, одржаној _____ године, донио је
(број сједнице) (датум сједнице)

ЗАКЉУЧАК

1. Савјет министара Босне и Херцеговине усвојио је документ *Информација о кретању макроекономских показатеља у Босни и Херцеговини за јануар – март 2025. године*.
број: _____ од _____ године.

Број: _____, _____ година.
С а р а ј е в о

М. П. Предсједавајућа
Савјета министара Босне и Херцеговине

Борјана Кришто